

本朝分省人物考

人物考卷之五十七目錄

江西南昌府

李叔正

朱夢炎

龔鏊

朱善

胡儼

孫貞

劉端

包希魯

附于實

黃宗載

劉孟雄

熊槩

孫日良

聶好謙

范求

况鍾

萬觀

王仁

熊尚初

陳安

羅虎

楊

瑄

附子源

李裕

熊懷

張元禎

王一夔

涂觀

丁璐

范瑛

于大節

熊繡

熊景

江潭

舒綱

楊廉

周季麟

艾璞

楊峻

范兆祥

熊卓

汪深

朱廷聲

熊桂

陳奎

周季鳳

萬夔

熊劔化

李材

魏良政

本朝分省人物考卷之五十七

南直督學御史西浙巡庭訓纂集

門人蘇松備兵副使南郡熊膏叅閱

男 過銘盤

過銘孟

過銘篋

寧國府學生員嚴弘志

句容縣學生員劉孔揚全訂正

江西南昌府

李叔正

李叔正初名克頤字克正南昌府靖安縣人年十二以能詩聞人以神童呼之既長博通諸子百家之言江西十才子叔正其一也方陳友諒陷南昌時妻夏投井死叔正終身不再娶歲丙午初設國子學時有以宗頤名薦者擢爲學正洪武三年告歸田里許之既退自齒於齊民已而廷臣以大學舊僚文行兼備無若叔正者登名薦剡誤以克正爲叔正四年徵至京師仍除國子學正遷渭南縣丞時同州人與蒲城人爭地連年不決行省以是事委之叔正卽單騎至其處召二家至前立談而決縣歲輸糧二萬而田無

定額乃令里社丈量立法密而刑嚴奸慝警服畢
獻其誠於是豪右失計公私交便遷興化知縣尋

召爲禮部員外郎年老乞歸不許除國學助教叔正
凡三至太學至是日與諸生講解立課程而督勉之
雖貴胄待之愈嚴旦夕端坐聽察誦習無倦容暇輒
會計廩饌毫髮無敢欺者 朝論推讓其賢能遂遷

監察御史嘗奉 命巡嶺表會有瓊州府吏訐告其
守進表公座僉名鞠之抵吏罪而守之誣得直 上
聞而大悅獎諭之曰人言老御史懦乃明斷如是邪
連擢湖廣叅政陞布政使 召還爲禮部侍郎十四

年陞本部尚書卒年六十四

朱夢炎

朱夢炎字仲雅進賢人夢炎元至正進士爲撫州金谿丞歲丙午以故官入京延居上賓館命與儒士熊鼎等集古之忠良奸邪事實以恒辭直解之爲訓士書及務農技藝商賈書使貴賤之家講誦通知大義書旣成有白金及衣帽鞞鞮之賜俄除國子博士俾領胄子教之夢炎日以所爲書訓迪諸生兼使讀誦經書無所弗率教者上時召問夢炎奏對詳雅應制作爲文章皆典則有據上益重之吳元年遷

翰林修撰坐小誤出爲浙江按察司經歷洪武二年
轉山西行省員外郎是年入爲禮部員外郎尋陞侍
郎十一年四月陞本部尚書夢炎博學善記通歷代
文獻之學如指諸掌 朝廷稽古議禮審樂皆有力
焉

龔 鏊

龔鏊字子諫南昌縣人由舉人授兵科給事中擢雲
南按察僉事秩滿詣京以諫議謫役尋起爲廣西僉
事復調廣東薦陞按察使所至以廉潔自將盡心所
事多所建明咸切時弊年七十一乞致仕詔允之至

是卒歷官餘四十年家計蕭然無忝纍積平生剛介直諒不以富貴累其心官雖蒞急泉未嘗尚嚴威尤人之所難云

朱善

朱善字備萬江西南昌府豐城縣人少聰敏十歲能文通五經四書大義祖雲洞先生嘗謂人曰吾孫他日必爲令器及壯以經學授徒壬辰兵變隱居鄉里養親教子杜門絕跡以聖賢道學爲己任奉繼母克盡孝道友諒戰爭扶母奔竄十餘日復全人謂孝感所致高皇平一海內開建學校乃以豐城爲富州

州守延善至郡庠教有成效以名聞於朝授郡學
教授洪武八年延試諸儒善爲首乃除修撰署院事
知制誥逾年以奏對失旨謫戍遼東十七年上思
用老成驛召善還京以爲待詔善常奏有國者重世
臣有家者重世婚近日禮教弗明婚姻混亂或已聘
而見絕或旣婚而復離議律不精其禍乃至於此成
周之世爲婚姻者不過齊宋陳杞數國而已故當時
稱大國曰伯舅小國曰叔舅世爲婚姻可知也列國
之君曹衛陳鄭秦晉莫不皆然降及後世如晉之王
謝唐之崔盧潘楊之睦朱陳之好罔不以世婚爲重

今宜弛禁以迓人情別族以明世教 上從之十八
年 命主考禮闈撤棘之日乃趨遷奉議大夫文淵
閣大學士五月辛酉朔 上御華蓋殿命善進讀心
箴善復言曰古者人君致治重在任人蓋任衆賢爲
耳目則視聽周乎四海任衆知爲討慮則利澤施於
萬民今天下太平惟選任賢才宜留聖慮 上曰任
人之道當嚴於簡擇嚴則庸鄙之人不進當專於任
使任使專則苟且之意不行然必賢者乃可以專任
之非賢而專任者必生亂也是任人爲難然人亦惟
始終如一者其懷忠報國之心堅如金石然後任之

若匿詐似信懷姦似忠者決不可任也是年九月忽
遭危疾 上遣醫調治其子逢掖請告還豐城卒年
七十有二屬纊正冠危坐舉手加額曰感荷 聖恩
無以報也語畢而絕鄉人見有星如虹墜其舍所著
有詩經解願輯釋史輯諸書正德間賜謚文恪

胡儼

胡儼字若思南昌府南昌縣人自幼好學受經於伯
父虞部員外郎汝器自求賢士相師友熊伯機以古
文辭自高一見儼亟稱其有所養以古文法授之既
長博極羣書至於天文地理律曆醫卜皆通其說洪

武丁卯舉鄉試第二人明年中會試乙榜授華亭縣
教諭時年尚少而能以師道自任勸勉諸生務實學
勵行檢以變浮靡之習日親講授每至夜分雖隆寒
盛暑不廢父老皆稱重之俄以內艱去繼改授長垣
縣上疏乞近便養親改饒之餘于自是著爲令其在
餘于如華亭時士子樂從之成效居多已卯以薦陞
桐鄉令爲政以愛民爲本凡可便民者以身任之民
間積年逋負悉與奏免邑中虎爲害傷民物乃齋沐
告於神虎遂滅跡表朱桐鄉墓俾民奉祀嘗督漕運
次三山值大風雪遇中流有覆舟命僕夫援之活其

被溺者三十餘人捕蝗途中見饑餓病者悉命里胥
扶掖就民舍給以藥石是夜大風雨得免暴露存活
數百十人其治行卓異不羣識者知其必得大用壬
午軍旅方殷廣求以集事御史府左副都御史練安
薦於朝稱儼學足以達天人之際智足以資帷幄之
籌於是召至京師未及任用而 文皇帝已渡江矣
翰林缺人吏部以儼名上爲翰林供事陞檢討尋陞
侍讀命同解縉等七人直內閣備顧問儼在七人中
遇有顧問必從容審度而後對未嘗以才智先人特
論多之甲申陞左春坊左諭德兼官如故侍 仁廟

卷之三十一 七

於東宮在講筵凡古今治亂得失必反復敷陳以圖裨益以外艱去 詔奪情道過南京入見 東宮詢

及民情所對皆切時事其年九月由內閣出拜國子

祭酒以身率諸生奉守學規以圖成效一時人才翕

然從化為 文皇帝所禮重時國子生有以故告歸

者皆坐成儼上言其請有可矜者得免永樂四年丙

戌三月 上幸太學 彝倫堂賜坐講經儼講尚書

堯典從容敷暢 上俯聽甚悅賜賚優厚儼雖掌國

學然朝廷有大制作若纂修 高皇帝實錄及永樂

大典天下圖誌諸書皆為總裁未嘗去館閣儼復善

書所進歌頌詩文詞翰並美 上益簡注五年丁亥

獻平安南頌七年召赴行在八年二月 上命以祭

酒兼侍講掌翰林院事供史職命戶科都給事中胡

濙署監事十年十五年俱供事行在翰林院復直內

閣輔導 皇太孫監國縝密謹勅上下無間言十九

年定鼎北京改北監洪熙春以疾乞致仕賜璽書褒

美加授太子賓客致仕復其子孫賜寶楮爲道里費

仍命有司給舟車還閒居二十餘年日與學者講求

性理之學親藩禮遇之方岳重臣咸待以師禮與之

言未嘗及私目處甚澹薄歲時備足衣食嘗表許遜

韋丹廟請春秋致祭修白鹿書院羣儕中有不合卽引退不與辯以故所至能全交旣歸田里雖聲聞不
至於朝廷而在朝論舊德耆俊者必歸焉館閣舊遊
歲時存問不絕輒相與倡和達官顯人與東南好文
之士徵言者足相躡於門正統癸亥卒年八十三訃
聞 詔遣官諭祭命有司營葬其爲文以理爲主不
尚辭藻所著有願菴文集行於世

孫貞

孫貞字宗正豐城人洪武以貢充國子生中癸酉鄉
試甲戌登副榜者百六十餘人詔三等銓之貞得教

授紹興有施御史者按郡甚嚴私於給事徐氏子旣
令充增廣生又升而廩膳之貞諱不可御史氣爲沮
郡官皆從旁私語使姑許之退可改行勿與面質貞
曰君子與人以信焉有今日許之而明日可改御史
知不可奪遂止及奏績爲諸郡最府有張通判以廉
介稱坐事繫獄都臺獄吏索賄不得多所挫抑事白
復官人疑其必易所守而張廉介自若會詔下教授
得薦賢貞卽舉張遂擢按察僉事張貧甚無所治裝
貞卽資之行永樂紀元貞秩滿陞國子助教嘗謂學
須以靜爲本因立家教以示法於是閤其燕居之樓

閉諸子其上親授以經諸生效之多成材者時博士
黃彥清與貞連居因熟其從子金蘭後彥清以姦黨
沒家金蘭爲貴池典史坐累至京失所歸貞館之三
年有不足輒周之或傳言將罪彥清鄰佑又謂將罪
金蘭宿主貞皆恬不爲動同鄉楊伯震爲長蘆運副
得罪自獄中出病疫繼復人色昇至貞門欲托寓焉
旁舍懼其相染固却之伯震遂露臥祠下貞歸聞之
嘆曰人各有命病豈能染耶亟命移入病卒以愈貞
嘗署監事監生在歷有事故不在官者所司移文問
狀六館紛然莫知至經旬不得報貞乃作類姓簿各

錄姓名籍貫班次欲求其人索姓下卽得之監中釋
便遂爲定法子曰良時爲御史同居每夕歸必問今
日治何獄當則喜有不當輒切責之以是竟能其官
曰恭爲翰林編修分月俸致養卒不入升斗爲已費
壽以欽賜銀幣不發封輒還之而報以書曰我俸恒
足爾宜自養爾廉勿復致也宣德初奏乞歸省卒年
七十五初爲國子生時與郡人盧淵同舍及寫武臣
誥與主事夏原吉同事教紹興時與郡守李慶相善
後淵至侍郎原吉慶至尚書貞未嘗一至其門其自
守如此所著有竹齋文集

劉端

劉端南昌人由進士官大理寺丞廉明執法靖難後
因治方孝孺獄暑月縱息樹陰劓鼻自卒平生負浩
然之氣每以天下事自任在詔獄時有詩云綱常干
古事此日屬銘彝所著有儒行十二篇懷古詩集并
百家輯錄隆慶初詔恤革除死難諸臣建大節祠以
祀之

包希魯

附子實

包希魯進賢人學問該博制行高潔門人受業者必
先德行而後文藝士習爲之一新稱國忠文先生所

著有諾若集子實夫力學明經事親至孝一日獨行
忽遇虎銜其衣曳至林莽中實夫曰爾欲食吾肉吾
何憾念父母垂老缺終身之養虎知我乎虎乃起復
曳其衣至故處而去人以爲孝誠所感永樂中旌其
門

黃宗載

黃宗載豐城人自幼喜學年十五已能爲里塾師爲
郡庠弟子從熊伯機受春秋遂取進士爲行人謹於
自治奉使四方未嘗受饋遺歷左右司副爲司正以
父憂去治喪無違禮不飲酒食肉者三年服除領舊

職永樂癸未以賢舉授湖廣按察司僉事時湖廣諸道惟銅鼓五開最難治分巡刷卷者多憚行蓋天下巨姦宿猾皆謫戍其間善舞文弄法興事撓官府而陰把持其短長往者欲稍按治卽糾結如膠漆不解欲一切漫漶則見嗤無可奈何多避不肯往載至當刷卷卽毅然治行到武陵問風俗知其人苦於從軍女子惡爲軍婦不果嫁男子則慮婦家往從戍而以徭賦累已不果娶至年三四十猶獨處乃召鄉老里正諭人道大端俾轉相告語務嫁娶以時不踰月成婚姻者三百餘家他縣聞風皆樂從俗爲之變乃榜

論銅鼓五開諸姦豪數其罪惡且發其善端曰不改
必寘之法衆知德化人人相戒勿犯比至莫有干於
理者丙戌徵詣文淵閣修永樂大典書成受賞而歸
已丑坐累謫楊青驛處之如平時遣一力受役而躬
自執爨暇則閱書史以吟咏自娛癸巳起爲山東道
監察御史侃侃自持乙未上親策士於廷時鴻臚
無卿丞張斌任事恃城守功最狠戾多所中傷人頗
憚之以不與讀卷至爭論上前不已載奏斌不學無
識不可以讀卷乃敢煩瀆 聖聽如此當伏法士論
壯之丙申命巡按交趾交趾城中諸軍營房覆以茅

故多火因廉知軍民歲歲伐材陶瓦備官用然皆資
權豪命三司幕官稽其數凡有取者皆著於籍由是
無敢私費不半年營房皆易以瓦覆火患遂息及歸
行李蕭然無交趾一物己亥丁祖母憂居家有旨奪
情授貴州道監察御史甲辰 宣宗皇帝正位東宮
鈔選官僚職輔導擢詹事府丞未幾陞行在吏部右
侍郎時少師蹇猶兼領吏部事多倚載載協力一心
進退人才必準公論不苟爲異同故一時號得人洪
熙元年賜誥命制詞有清潔平恕恭謹厚重之褒遂
南轉南吏雖無銓選之勞而勞於馭吏蓋其人率多

邪巧見害必避見利必趨往往冒法以僥倖載正已
率物無少回撓屹然如泰山喬嶽不可撼已未進階
資政大夫制曰寬和有執廉靜自持又曰小心慎職
始終不渝人以爲實錄旣孝於親篤於二兄仲氏宗
曼有孫孤承裔貧苦不能自立載命其子文凱儒凱
收養之文凱先卒獨儒凱繼其家及載歸卽爲承裔
治居室使仍守舊業毋廢墜

劉孟雄

劉孟雄南昌人以賢良擢龍溪知縣縣與潮接境山
谷崑阻有陳永定者負險爲寇抄掠傍縣累歲不能

制孟雄至以計掩捕之先是爲邑者多貪闇不職吏
黃緣爲奸徭役不均民富者幸免貧者不勝其困多
竄徙孟雄覈其戶之虛實而等差其役流民間者相
率來歸勸農務耕禁淫祠寬刑罰衛善抑奸邑以大
治秩滿陞安州知州龍溪縣民相率奏乞留之授知
州職還治龍溪甲子歲卒

熊 槃

熊槃字元節豐城人永樂九年登進士拜監察御史
聽決精敏若老於吏事者卽以能稱時 成祖駕幸
北京 仁宗以太子監國事槃侍朝立文華殿門下

於大眾中見其狀貌壯偉問侍臣誰何以槩姓名對
十六年藩憲大臣員缺 成祖命吏部簡兩京朝臣
有材望者補之槩擢廣西按察使 仁宗宴於禮部
予道里費至則慨然以戢吏姦恤民隱爲己任屬谿
峒蠻獠大出殺掠居民聲搖諸郡桂人大恐布政使
議欲請於藩王出兵以遏之槩曰吾等受方面之寄
寇至無計捍禦乃以煩藩王事聞誰任其咎寇必不
至戒嚴而已旣而果然議者服其識有居官而沒於
其任者家以道遠弗能還 朝廷詔所在給舟車歸
之有司迫促甚至槩念男女生聚有年一旦遣行貲

用凋落奏乞聽其便從之十八年調廣東二十二年
仁宗正位召至而宮車宴駕 宣宗親政以常鎮蘇

松浙東西諸郡豪右之民往往挾詐力持吏短長脇
制州縣肆毒善良無厭細民苦之特改大理寺卿

命偕中貴人往按之槩亦知 上用已之意徧歷其

地凡官吏之無狀民之尤無良爲巨蠹者籍其家盡
械以歸於京寘諸法聲振動於一時海鹽民吏慶真
自號平康聚無賴之徒恣行剽掠有司累歲莫能禁
聞槩至盡室遠遁得之武昌抵以殊死於是奸宄帖
息單弱之民舉安其業父老勤逸稱快三尺童穉皆

知其名而相與傳頌之所至以餘力新學宮勸勵諸生先賢若胡安定范文正魏了翁三陸祠宇之傾圮者葺之范氏義田及墾地爲人侵奪者歸之其子孫有賢行者禮之士類增重又奏應天府上元江寧差役頻繁今國子監缺膳夫請如洪武中事例以應天常鎮蘇松府縣罪囚應笞杖徒流者克役爲便上曰役有罪以蘇民力亦何不可命行在刑部議行之但用法過刻奸民有不便者誣以受賂有勢者以私怨欲擠之騰口言於朝上疑未之信遣御史廉問毫髮無所得還乃直其所爲上益信之賜璽書獎

勵槩亦自信不疑於利害當興除者皆列以聞松江嘉興兩郡接壤處其間地大民衆征調服役公私病之奏析其地爲五縣如其請四年入朝問勞有加特陞都察院右都御史往治南京院事始槩之出也鬚髮如點漆比還皓然盡白人皆歎其賢勞及斯命下又謂宜居是職槩材長於從政務持大體疑獄滯詞能立得其情而志存平反每具獄推見至隱惟恐吏售其奸民或不得其平故凡被其理者人以無冤尤嚴束羣屬恒舉古人剛方有志節者警之辭氣俱厲人人畏威奉法憲綱用振明年 賜誥命進階資善

大夫未幾丁內艱八年召爲北京右都御史在 上
前知無不言於繫囚枉抑者多所申雪故事車駕巡
幸以文武重臣留守槩兩被是命九年兼署刑部事
自朝慮囚日宴未暇食忽風眩尋卒於官壽五十槩
爲人身長六尺神色明秀望之屹然可畏久而知其
坦然無城府與人交恩意備至居家孝親友兄弟庭
內無間言在官不以仕優而廢學有聞輒手記經史
論說古今聽者忘倦爲詩文豪偉健麗似其爲人尤
善草書四方有求之者雖祁寒盛暑忻然應之所著
有芝山公餘二稿藏於家

孫曰良

孫曰良字良齊江西豐城縣人永樂辛卯進士授監察御史時朝廷初復安南地欲得老成有風力者安集其民陞知交州府居藩服下民夷雜處尤爲難治曰良治甚有聲正統初超陞廣西布政使丁外艱起復總督廣西兵備未幾丁內艱以北虜入寇起復陞右副都御史鎮守臨清景泰二年以疾乞致仕弗得乃舉都御史韓雍李匡輩十人自代章三上許之居家二十三年而卒年八十七訃聞賜祭葬如例曰良豁達有雅度與物無競歷官中外所至有惠愛及人

隱然有古循吏風自奉薄而忘於義俸祿餘貲恒以散宗戚之貧者家居足跡不一入公府鄉人賢之

聶好謙

聶好謙豐城人永樂中進士授工部主事遷郎中擢知廣州府抑強扶弱除弊革奸權貴有所需拒之弗憚郡稱爲仁懷太守時新會寇聚知其名撫之卽降去之復叛後卒於官民祠祀之

范衷

范衷豐城人永樂中進士歷昌化泰和二縣尹陞知汝州居官清苦每去任民輒哀戀不舍時天下廉官

三人衷爲第一性至孝廬父墓瓜生連理又有三白兔遶墓馴走人謂孝感所致二子鏞鏜皆第進士官藩臬長有聲於時鏞任廣西政績尤著

况 鍾

况鍾字伯律靖安人初以吏員事禮部呂尚書震尚書薦其才永樂十三年授禮部主事二十年陞郎中初令五品以上京官得薦士鍾薦右中允張宗璉

上召問西楊曰人皆薦下僚鍾乃薦朕官臣耶對曰臣與王直擬薦宗璉不意爲鍾所先 上喜曰鍾能知宗璉卽日陞宗璉大理寺丞宣德五年知蘇州府

賜勅乘傳之任初至郡佯不解事諸吏抱案環立請
判鍾顧左右問吏吏所欲行止輒聽吏乃大喜謂太
守愚越三日召諸吏詰曰某事宜行若顧止我某事
宜止若顧欲我行縛諸吏拷掠投庭下輒死者數人
諸吏又皆大懼謂太守神明乃盡覈屬吏斥貪墨者
五人庸懦者十餘人八年夏旱慨發預備糧賑農俾
得盡力於田畝復與周文襄公講究收糧法由永樂
間轉輸北京餉道遼遠糧長以一徵三府二百七十
萬石加徵至八百一十萬除正供及餽車船費盡爲
糧長乾沒議別立糧頭同收受互覺察除免舊徵三

之一以其二之一爲轉輸費餘皆入濟農倉爲來年經費本是年馬草米數十萬石及九年夏稅折布絲數十萬斤絹數十萬疋小麥數十萬石及雜出供費並代以餘米上無通事下無橫科民大悅每旱又輒發此餘米賑活輒數萬人二十餘年積弊不戮一人而盡除民接遞終歲在官不得負販叙丁差歲不過三日盡罷其在官者置綱運簿防運夫侵盜又置館夫簿防非禮需索綜理周密簡約易行大抵鍾爲守專屬豪狡拊良善勢家有犯法立死杖下吏民大驚奉約束寒門下士有行藝者時時賑贍有鄒亮者獻

詩於鍾鍾極爲稱賞欲薦於朝會有以匿名書數亮
過失揭府門者得書笑曰彼欲沮吾薦正速成亮名
耳遂奏亮才學可用召試授吏刑二部司務轉監察
御史正統元年劾御史王璉罪狀法司論逮璉歲滿
去民叩闕乞留者八萬餘人陞正三品仍知蘇州府
七年卒市巷哭送其喪競立祠以祀鍾剛正奇偉潔
廉之操一塵不滓操履之固千夫莫回令行秋霜靡
暴弗馴惠流時雨靡悴弗煦後有至者莫能及焉

萬觀

萬觀字經訓南昌人登永樂辛丑進士第 太宗文

皇帝欲老其才而用之俾歸進學尋召爲福建道監察御史未幾陞嚴州知府七皇礮聚漁舟數百艘晝則漁夜則肆剽竊行旅患之乃下令凡十艘爲一甲各限以地使自相守有所鼠竊者必連坐能改過者俾安業如故不期月皆化爲良善郡中多大山田少民貧觀巡行勸課山有可耕者聽貧民耕鑿而俾富者助之民食以足歲造段江多於他郡則請計民力爲準而減之遞運船多而遞餉少歲治船爲民病則請減其半地少蠶桑而絲稅多民弗便請以銀代輸考績來京師吏部以聞詔賜誥命以寵之時天下郡

守拜賜者僅三人觀爲首丁艱服除知平陽先是百
工赴役京師者皆後期工部下有司遣人送之械繫
如罪人有死於道者觀憫焉後再遣時召而諭之曰
爾以匠藝當赴役而自取譴累人以惡人待爾故械
繫以苦之今我以善人待爾去爾杻械令自往爾能
誠信奉令乎衆皆懼曰謹如教無一人敢後者堯祠
廢奉請新之芝生於棟或歸美於觀觀曰吾知修祠
而已芝非吾事也滿九年考績陞山東右布政使下
車七日卽出視民瘼野有蝗督有司捕之且虔禱於
神蝗遂息陞左布政使景泰元年十月卒年六十四

王仁

王仁字得仁本姓謝新建縣人也德性淵宏資質重厚體貌魁梧音吐洪暢甫五歲母喪哀哭晝夜不絕聲稍長從師受學書一覽卽成誦不事嬉遊而動中矩度弱冠代父兄爲百夫長調度措置咸中理督漕運事隨集而民不擾遂爲有司所舉薦宣德間授汀州府經歷九載秩滿耆民千餘人保留藩憲疏以聞授承事郎後本府缺推官六邑耆民二千餘人復列名赴上官言其存心公平讞獄明允乞授前職以慰民望上官轉達於朝遂陞授推官其在汀凡十八年

始至汀禮部員外郎許敬軒奉勅爲太守以嚴厲待僚屬見仁議論正大剖斷公平遂委心聽信汀州衛軍素橫暴民被其害民人楊卯生被賊殺且劫其財咸以爲暮夜莫知賊爲誰仁曰殺人非細故不可以不究遂呼其婦而問曰汝夫素與何人相善婦曰與江州衛軍人支繼安鄧普堅交厚每與交財時二人適在家遂執二人訊問卽引伏百戶王能毆死府卒王勝詐騙民財皆舉正其罪自是武夫健卒震懾不敢肆有內臣至郡索白金仁曰郡僻小而民貧所產無異物且妄取民財明有禁例內臣怒欲示撻仁拂

袖而出言欲聞於朝其人懼遂行未幾委清軍長汀岳老人等十二名坐埋沒當謫戍仁以其過誤而寬宥之後奉銀三百以致謝峻拒卻之弗受間以公私務詣上杭在道見民携老幼號泣而行問之則曰差役重而富人倍取息不得已而徙他邑以全生仁歸卽榜示禁革其弊且勸豐家巨室出粟以預賑貧民復業而全活者甚衆 朝廷命大臣巡行郡邑勸民出粟以預備賑濟藩臬官召仁計議與同至各郡施行會病而歸正統己巳延平沙縣反賊鄧茂七遣僞都督陳政景率衆圍汀州上官以仁歷練有籌略命

統民兵協同官軍出戰賊敗潰去咸欲入山以搜賊
仁曰民避賊匿山中今復加之以兵必濫及無辜無
以副 聖天子好生之心宜招撫以宥其罪鎮守都
指揮馬雄遂下令軍中不許妄戮一人違者以軍法
從事官軍獲生口老婦三百六十餘人意圖功賞誣
以爲賊黨欲斬首以徇仁白雄此皆良民避難者豈
可殺哉悉辨遣之還家雄得汀民與賊交通姓名欲
按籍行誅仁沮以脇從罔治且求得籍焚之賴全活
者不可勝計旣而將樂賊寇寧化仁聞卽召募壯勇
躬出備禦不五日衆至一萬與賊戰於益洋賊敗走

追奔十餘里斬首百餘級生擒數千人民吳彥勝等
被脇在賊中遂携妻子七百餘詣營自歸悉宥其罪
而遣之還其鄉賊復聚將樂之常平仁以計令吳彥
勝率其先被賊脇從者往常平偽穿都御史余公家
誘擒鄧茂七姪鄧受其姊夫楊受生等三十六人而
歸凝率衆趨常平搗賊巢穴會疾作而止病且革吳
彥勝等籲天乞以身代死衆欲與仁歸郡仁奮曰吾
若一歸賊必長驅豈可乎乃起坐帳中呼陳陵及諸
夫甲而語之曰汝等務盡力以殺賊慎毋退縮吾生
不能殺賊以成功死當助汝以滅賊無一語及家事

遂卒時正統十四年也年六十吏民立祠以祀

熊尚初

熊尚初南昌人由吏員舉授都察院都事轉經歷陞
福建泉州知府會大寇鄧茂七猖獗鎮巡檄以監軍
不旬日降賊數百明年賊復逼境闔帥危懼尚初歎
曰受命一方本以安民今寇出不時由我不職所致
寧一人受害無致下民受殃遂單騎出城爲流矢所
中卒有司嘉其忠配享忠臣廟

陳安

陳安新建人正統間進士授大理右寺副審獄詳慎

多所平反陞陝西叅議歲旱禱雨輒應改雲南會滇池暴溢滄没多方賑給活人十萬餘累遷布政使引年致仕

羅 篴

羅篴南昌人舉進士拜監察御史活閩寇少壯者三百餘人累陞右副都御史巡撫湖廣撫諭苗獠歲饑多所全活召還上疏乞親萬幾用正人節賜予等事皆人所難言未幾致仕卒所著有知菴集

楊 瑄 附于源

楊瑄字廷獻豐城人景泰甲戌進士天順初爲御史

印馬圻內民羣訴太監吉祥忠國公石亨二凶奪民田若干頃瑄疏劾二凶怙寵擅權勢上喜其敢言稱職命吏部記其名且將大用旣而還京彗孛連見祥亨二凶日益張瑄與十三道御史謀劾之有洩語二凶者二凶先譖諸御史上前暨彈章入上怒召諸御史詣文華殿俾誦彈張詰之瑄與御史周斌且誦且對歷陳二凶罪狀甚悉上意主於先入遂下諸御史詔獄逼以誣引大臣刑甚慘酷數瀕死卒一語不他及理刑者坐死掌道者謫戍餘貶斥奏上會京城大風雹拔木壞屋走正陽門下馬牌於郊外

得從未減瑄竟戍遼東鐵嶺道遇赦還或謂瑄詣二
凶謝庶免後禍必不往復謫戍廣西南丹二凶相繼
逆誅釋歸 憲廟卽位言官論奏復其官尋陞浙江
按察副使定海城北捍海塘并海鹽海塘皆葺理修
築海鹽塘踰二千三百丈工尤巨禦患尤大陞按察
使甫半載病亟寮案問候尚諭築海塘法及濬西湖
之利旣卒海鹽人德瑄立祠東海上著爲祀典瑄子
源弘治間任五官監候正德元年七月源上疏言占
候得大角及心中星動搖天變天璣天權星不明乞
安居深宮絕遠遊獵罷弓馬嚴號令毋輕出入闢除

內侍寵倖遊逸小人節賞賜止工役親元老大臣日
講習詩書疏下禮部部言源占候之言深切時弊源
復疏言十月二十六日占候得連日霾霧交作爲衆
邪之氣陰冒於陽臣欺於君小人擅權爲下叛上引
譬甚力劉瑾怒矯旨杖三十源又疏言自正德二年
來一向占候得火星入大微垣帝座前或東或西往
來不一乞思患預防瑾又大怒罵源爾何官亦學爲
忠臣乎矯旨又杖三十謫戍肅州行至懷慶卒於河
陽驛妻斬蘆覆屍葬之

李裕

李裕字資德豐城縣人景泰甲戌進士授監察御史時都御史寇深方有寵待屬吏甚嚴裕獨不爲屈巡按陝西上安邊八事時石亨父子勢傾中外以僞報邊功移覈裕焚其求庇之書竟按劾之天順癸未陞山東按察使諸死獄久不決者無慮數百旬月間鞠之殆盡青州山砦盜嘯聚裕縱釋脇從免其逋負渠魁旣獲事遂平成化庚寅陞陝西左布政月餘召入順天府尹請寬徵需革和買禁田土投獻罷官校供應皆從之給引不入錢每引止輸楮鈔各二張自裕始遂著爲令癸未陞右副都御史總督漕運兼巡撫

廬鳳諸郡戊戌以父喪去任壬寅服闋詣京留理院
事癸卯進右都御史振肅風紀臺中凜然御史稍有
過或遭箠撻由是得謗明年調南京都察院丙午來
考績遂轉工部尚書尋轉吏部時鄉人李孜省方以
左道得寵於 憲宗弘治初言官以裕之進由孜省
裕爲辯誣錄竟連疏乞致仕去裕修形偉貌識度弘
遠所在以廉介稱爲吏部會朝覲考察請更立才力
不及一條以存愛惜人才之意前冢宰有以私憾擠
排江西人士者裕懲之一無所校人服其公卒之年
八十有八遺言勿乞祭葬擾鄉里

熊懷

熊懷字性安豐城人天順丁丑進士由部屬歷官至布政使弘治初吏部尚書王恕屢薦懷爲巡撫都御史皆不用恕詢其故當軸者應之曰某不識熊懷爲何如人蓋懷謹於自守未嘗有書通問於當道也始擢爲南京光祿寺卿又擢南京刑部右侍郎庚申致仕辛巳卒懷性嚴重寡言笑平居尤謹禮節薄嗜欲言論侃侃所至以稱職聞晚年雖少不振然能持大體且奉身而退終始之間蓋亦無訾議云

張元禎

張元禎字廷祥南昌縣人生而靈異五歲出語驚人
寧靖王聞其名召見之命爲韻語響應無窮有心定
萬事定之語王倬然驚曰異哉斯童他日必爲國
家偉器父松亭翁携以入閩閩人所在聚觀丐其詩
文少長還爲弟子員都御史韓公雍甚奇之初寧靖
王書元微二字貽之因以名至是韓公爲易之曰元
禎字廷祥謂當爲國家祥瑞也天順己卯領鄉薦明
年擢進士時詔北人爲庶吉士而南方止三人江西
惟元禎文名歟起久之授編修會憲宗初卽位上
疏勸行三喪又上疏言治道大本大原曰講學曰

聽治曰用人曰厚風化行此四者則庶政畢舉三年
丁亥與時宰議不合迺乞歸家居二十餘年益潛心
性理之學名益高廷臣疏薦者甚衆有謂氣節恬退
當今鮮倫至有學貫天人之許當是時士大夫日望
其起而元禎確然如不復有意於斯世也 孝宗卽
位召同修 憲宗實錄至則擢左春坊左贊善又上
疏勸行王道反覆幾萬言四年實錄成陞南京翰林
侍講學士本年乞歸養母家居九年至十二年修大
明會典召爲副總裁至則陞翰林學士侍經筵日講
時 孝宗雅意向用旋以母憂去十五年服闋擢南

京太常寺卿十六年修歷代通鑑纂要又召爲副總裁至則改太常寺卿兼翰林院學士掌院事仍侍經筵日講并侍東宮講讀十七年命掌詹事府事管內閣誥勅上疏勸經筵宜講太極圖西銘東宮兼講孝經小學孝宗欣然嘉納亟索太極圖以觀曰天生斯人以開朕也且將大用之不果武廟卽位進吏部左侍郎仍充實錄副總裁未及上正德元年疾卒元禎癯然纖弱而崖岸孤削剛毅之氣不可犯人有過面折之爲文必欲作不經人道語晚迺削異爲同黜奇爲平所交若陳布政選羅修撰倫陳檢討獻章

皆以道學自許者歸臥林下名高一時天下士想望其風采云

王一夔

王一夔字大韶後復姓謝新建人仁之子也天資溫粹弱冠從翰林侍講吉水尹鳳岐讀蔡氏書尹覽其所作經義論策大加稱賞語諸生曰大韶他日所就吾不及也赴江西鄉試名在前列天順庚辰領春闈第一及廷對英宗皇帝策以禮樂刑政之要夔所對上惟唐虞三代之盛下及漢唐宋沿革之詳凡三千餘言末又曰禮樂之本刑政之原不外乎一誠臣

願陛下遵此誠以興禮樂則大禮與天地同節大樂與天地同和矣運此誠以用刑政則一政之出人信之如蒼龜一刑之施人畏之如鈇鉞矣 英廟覽之深契聖衷賜進士及第擢翰林院修撰又命與庶吉士楊英等同進學於翰林俾讀中秘書繇是所學益博發爲文章不爲奇崛雕刻之詞而純鬯淵永人共推服少保李文達每以偉器期之修 英廟實錄文達爲總裁以夔爲纂修官據事直書得史官體今 皇帝初御經筵以夔爲講官實錄成陞左春坊左諭德會朝廷以星變求言上疏陳五事一日正宮闈以

端治本二曰親大臣以詢治道三曰開言路以決壅蔽四曰慎刑獄以廣好生五曰戒妄費以足財用忠懇剴切多人所不敢言者士人翕然稱之上以宋元二史予奪迄無定論特命內閣儒臣妙選學識老成者用朱子書法編纂成書以續通鑑綱目時翰林在選者僅十四人而夔與分修元史因推廣前待制王禕之論以爲泰定帝爲世祖長孫宜承大統燕帖木兒迎立明文不過欲因際會圖富貴爾故於燕帖木兒舉兵以謀逆書凡以兵附燕帖木兒者以謀叛書於上都遣兵以討叛書一正前史之謬君子躋之

書成進 御陞翰林院學士賜宴於文華門右廊又
賜鈔一千貫成化十四年二月 皇太子出閣詔簡
儒臣充東宮官夔與學士彭彥實等皆以學行選侍
講讀十九年九月陞禮部右侍郎凡制度儀文多所
裁定冬陞工部尚書工部所掌素號繁猥而工匠之
長號作頭者持吏短長恣爲姦利夔攷校案牘嚴勾
稽剔蠹弊謹物料出納之數正匠作逋匿之罰斥遣
作頭不得近左右凡有營繕必計程期以授屬官之
廉能者使董之故費出有經人無久役二十三年得
痰疾卒年六十三事聞贈太子少保在翰林屢典文

衡嘗考禮部貢士得羅倫置諸魁選已而倫以狀元及第考南畿貢士得王鏊以冠多士及試大廷鏊名在第三人皆服其鑒所著有古源文集若干卷藏於家

涂觀

涂觀字恒孚奉新人天順庚辰進士歷任南京吏部驗封司主事考功文選郎中出知衢州府改寧國府詔進階中憲大夫成化初年又進階亞中大夫觀在考功當考察南京庶僚力與本部侍郎章綸爭可否既連署上章觀復別疏請汰十餘人 憲廟命廷臣

葉盛覆覈之卒從觀議以其所執爲是在衢州寧國政尚寬平見州縣吏以深刻生事取聲名者輒不謂然二郡雖未久任而田野細民無不安之感其惠至今立心坦易推誠任真雖面折人人不爲忤至退而後言亦曰先生直人也於諸經往往涉獵其精專在易於史書上下三千年事記憶皆有首尾詩才文章類流麗灑落文從事衍以爲酬應之作不復存稿所著惟六書音義正統世年表行於世春秋八十正德元年正月卒

范瑛

范瑛字俊彥豐城人天順庚辰進士成化戊子授行人奉使閩浙諸司舉故事致贖盡卻之奉命代祀南岳及境時有鎮守戒行巡撫以下欲往餞之懇瑛鄉人陳布政致意少待瑛不可厲聲曰君命與鎮守孰重諸公聞之馳馬郊迎無敢後者授河南道監察御史巡視京師有倚勢毆人者置之法都御史李爲之求免不聽巡按陝西專理茶禁先是三邊缺馬廷議欲資茶以市馬瑛謂禁大嚴則利盡刀錐以病商太弛則利歸權勢以病國乃斟酌行之於是官茶行而邊馬足荊州缺知府銓部以大郡難治擇老成御

史以往乃以瑛名上聞 詔可之朝士咸謂荊州上有藩封之親下有軍校之橫中有諸衛之錯布相抗前守多弗善其去且其地所謂雄據上流表裏襄漢者一遇歉歲易以生變瑛至藩封日遣人詣府促修造凡用工料價銀與夫匠瑛呼吏取文案視之奉奏行十無一二乃歎曰此前官畏勢承順耳吾不能也卽移文上下諸非奏行者悉停罷之陞廣東叅政致仕弘治庚申卒

丁 璐

丁璐字元美豐城人登天順進士授工部虞衡主事

丁丑以差遣復命除都水成化丁亥以展省赴部復
除虞衡已丑以兩考轉四川叙州知府戊戌以三考
轉至廣東左叅政璐初在虞衡出清淮揚諸郡匠最
號嚴明風采凜凜在都水督六科廊匠事見權璫同
官咸屈膝璐獨挺立衆中權璫怒欲折辱之向闕大
呼同官挽之而出詰朝自司空而下皆詣謝過欲強
璐璐竟不往先是諸璫時時於工部索匠璐往來二
司一切嚴拒諸璫有憾言璐謂吾當先具以聞自是
搖手相戒無敢復至索匠者在叙州松潘有警通判
王衡奉巡撫檄調鏢手夷人於戎拱之間夷人圍衡

欲加害璐單騎馳往衆見之皆投戈於地舉手加額
曰我公來吾輩當盡室行即日隨調者三千人百戶
王甲占慶符田數百畝十餘年不輸稅平民具奏聚
亡命田舍中堅壁不出近之欲殺人璐徐以計獲之
藉田而歸之民民爲之畫像立祠乃亟令毀之有張
乙沒兄之官下物而不以分兄之子者兄之子訴之
官璐呼乙至令獄中盜詐之曰吾所劫某家某物具
在爾所乙拊心誓曰是吾兄爲官時所得也何爲誣
我璐令以三之二歸兄之子且諭乙曰爾得於兄亦
不貴矣慎毋讐其子遂感泣爲叔侄如初至廣東同

官重其名以潮惠二郡號難治者讓璐分守之璐毅然而往不旬月令行禁止囂俗革而邊境寧巡撫朱公復留之一歲且曰二年間置潮惠於度外者實倚公及城饒乎仍檄璐督視衝風冒雨益加勞瘁輿皂每勸當晚起早眠以避飛瘴璐謂其欲就安便以給已不聽城成而瘴已沾體矣成化辛丑奉表之京師便道過家疾作卒春秋六十有一

于大節

于大節進賢人天順末進士授行人陞監察御史巡按湖廣以直言謫鶴慶府推官歷陞浙江按察使以

不阿權貴遂稱疾去大臣交薦力以疾辭朝廷強起之改山東按察使卒爲人矜名譽甘清苦歷任三十餘年終始一操士大夫高之

熊繡

熊繡字汝明江西豐城人其先以戎籍隸湖廣寧遠衛遂爲道州人丙戌進士授行人擢貴州道御史巡按陝西風紀大振布政于璠素貪墨憚繡威名棄官避去繡追之急時當路與璠同鄉有連嫉璠誣繡他事逮至言按驗之無所得璠被斥繡亦坐謫知清豐縣有惠政乙巳陝西大稜父子相食吏部舉繡守鳳

翔清豐民遮留載道蒞任三日而雨歲登郡以無事
累擢山東左叅政右布政使轉左陞右副都御史巡
撫延綏三年以母憂去服除擢兵部右侍郎久之轉
左嘗奉命清騰驥四衛勇士得其冗濫者幾萬人請
裁革之權倖側目未幾擢右都御史巡撫兩廣首征
獐獍之負固者一境以寧舊例供億甚厚一切裁之
自廩米常給外秋毫無所取逆瑾用事密使人廉之
卒無罅隙可指摘召還南京掌院事尋令致仕而憾
猶未釋乃以大同浥爛布豆爲繡巡撫時事罰令自
輸粟五百石於邊繡性簡直清介臨事有執致仕後

閉門觀書不預外事不殖生產自奉儉約尤悻孝友鄉評重之卒之日贈南京刑部尚書賜祭葬如例謚莊簡仍月給恤孤米一石蓋異數也

熊景

熊景字開甫南昌人領己卯鄉薦成化己丑進士授刑部主事擢員外郎己亥轉郎中甲辰念母劉老無侍歸養因以是號志休退也爲主事屬部多大獄部長使鞫則屢掣於大闕貴人橫豎間隔法所入必脇使出所出必入景意一不爲動出入惟法無爽錙銖陞廣西部長凡所轄道則犴狴一空投牒受辯旁午

立門外入則惟聞脫校聲吏俯首書牘不敢睨人張
關節要昧爲姦二廣節鎮都臺朱公嚴於覈實以賢
監司許景檄景勾當潯桂諸徭徭人類而獸性居山
林遇擾動輒號跳叫嘯觸跳跟必以死逞靜則跽
伏不見踪跡景知其然約吾兵不得徙壁壘陰遣間
衣商人服負鹽抵徭所若爲潛竄懋易者徭不疑也
俱來調虛實問曰吾商人不知新按察官何人然見
其方具器若古壺狀者十數寶石其中窰以巨木計
曰徭出降無庸發此不然此嘗破大藤峽者也徭懼
自酋酋卽日降不旬日降徭及獠獠數十姓蓋景以

謀勝也熊之先居南昌杉塘世傳楚子熊繹之裔屹
然大宗元社將尼盜四起能以兵保障其鄉曰九成
人無少長咸曰善翁是爲景之高祖

楊廉

楊廉字方震號月湖豐城人自幼穎悟過人學以六
經爲正宗四書爲嫡傳周程張朱爲正派而飭躬砥
行不落塵紛成化丁酉中鄉試第一丁未會試第三
選翰林庶吉士移疾家居庚戌改授南京戶科給事中
益留心世務經史之外凡民生休戚財計盈歉邊
務利害悉研究顛末思以自効丙子丁內艱服闋補

刑科給事中戊午以便養請改南京兵科因地震劾
奏用事大臣首薦張元禎吳寬李京陽王鏊劉戩宜
備日講講書宜用大學衍義時論黷之吏部尚書王
恕被讒力言公卿不可無恕所宜優禮請斥遠讒邪
無爲所惑楊茂元盛應期因事獲譴奏乞叙復他所
論薦如周瑛周孟中劉大夏謝鐸林俊等皆有時名
屢上時政便宜凡十數事又兩因邊鎮有警陳言備
禦數事 朝廷采用幾盡又嘗論宋儒周程張朱從
祀之位宜右漢唐諸儒又因闕里重新請更立木主
以革夷教偶未及用識者惜之庚申陞南京光祿寺

少卿淹抑閒居幾三考惟潛心著述取濂洛道言與境多所關發管入賀 千秋節陳言輔導元良其說尤備丁卯陞南京太僕寺少卿時回務多暇環滁諸生多執經其門徧舉先儒異論分割是非娓娓無倦容尤謹其矩度崇廉恥外艱服滿陞南京通政司右通政前此軍民投狀或寢不行廉以政主於通不宜任情行止悉分送所司仍存其底備考壬申冬陞順天府尹以文學飾吏事不苟柔吐剛以省繁苛爲務市征襍賦皆酌其平豪猾不得爲輕重屬醜虜犯邊命將出師者再所須車輛約費銀數千兩兼以水旱

連年根本宜慮力言於兵部移大興遞運所餘銀以給之仍奏免夏稅一萬七千餘石令農民改撥者量入貲爲賑濟備民甚賴之慮各屬巧取民財每歲辦創作底簿具載其都數使上下通曉無能爲弊凡徵稅則例鄉飲酒儀節悉加裁定遇鄉會二試所需悉從官給盡革和買借辦之擾舊號舍用葺則易以木爲經久計立法簡而有數昌平縣以歲辦不前奏准陞州請轄密雲順義懷柔三縣復奏州貧不堪重役均車輛十之六於三縣使州無偏重釐各官馬夫銀於均徭使不得多取定陵戶貧富撥補之法使不

得影射皆著爲令乙亥春陞南京禮部右侍郎疏論
交修論廟禮論巡幸語皆切至駕臨舊都卽奏言臣
僚冠服當如朝儀又請謁太廟皆得俞旨世廟
登極用廷薦陞尚書首進大學衍義節略有旨褒答
前後凡八疏乞休癸未春求去益力特允所請歸里
中則杜門却掃縉紳益歸重焉乙酉以疾終年七十
有四上嗟悼贈太子少保謚文恪平生所著有文
集六十二卷劄記三卷奏議四卷家規一卷所述有
伊洛淵源錄新增先天後天圖學考証太極圖纂要
分類程氏遺書二程年表西銘旁通皇極經世啓鑰

象山語類洪範纂要禮樂書 皇明名臣言行錄皇
明理學名臣錄選註風雅源流唐詩詠史絕句月湖
詩稿白沙定山詩星略算學發明綴算舉例醫學舉
要名醫錄凡二十餘種

江潭

江潭豐城人成化中進士授南京屯田主事嘗捧部
檄覈蘆洲權璫多方賄之不得同官有中其餌者以
語搖潭一不爲動轉員外進郎中屢與司空爭事不
苟隨以內艱去服闋赴銓曹卒於京棺斂之資出於
親友潭學問精博詩文可傳言動不苟惜未究厥施

云

舒綱

舒綱本姓陳進賢人幼穎異領成化辛卯鄉薦一試禮闈不第遂棄科舉之業勵志聖賢博覽羣書父喪廬墓三年事母孝撫弟遺孤恤族中婚葬者動遵古典主教白鹿洞師道尊嚴綽有古人風

周季麟

周季麟字公瑞寧州人成化辛卯領鄉薦明年登進士授兵部武庫司主事陞員外郎中政無鉅細皆講求便不便而處之務竭其才始清禁軍再清畿內

及山東山西邊軍得健卒八萬青神余子俊鈞陽馬
文升以宿望相繼爲大司馬皆器而倚任之章疏多
與參酌乃行在部幾二十年守紀持重未嘗一跡權
貴人之門弘治庚戌陞浙江布政司左叅政屢斷寃
獄平巨盜遺利隱蠹搜抉殆盡戶部侍郎吳原以賑
饑至工部侍郎徐貫以治水至事率倚之而集丙辰
陞河南右布政未幾轉左其治如在浙而加慎焉農
民之收補庫藏之出納遠嫌任法無隙可議交代之
際貯銀至四十七萬餘兩人以爲難兩藩撫按之薦
舉者凡六七疏丁巳冬虜犯甘涼陞右副都御史往

蒞巡撫之任始至勒兵與虜戰斬首六十四級捷上
賜勅獎勵先是哈密忠順王中絕爲土魯番王速壇
阿力所襲部落數千人來奔寓甘肅弘治五年國人
擁立忠順之族屬陝巴復爲土魯番之叛臣速壇阿
黑麻所擄西陲之禍不解者四十年於是宣布德意
振揚兵威阿黑麻畏服乃送陝巴并原奪勅印抵甘
州季麟請仍立陝巴因經紀其事宜纖悉詳盡自是
諸部帖然蕃貢不絕陝巴之族弟安定國王千奔亦
慕義來謝事聞 孝廟大悅有白金文綺之賚時季
麟已自傷胃痛矣而於利害之當罷行者恒汲汲爲

之所屬邊境之苦寒切近諸夷嘗親歷久駐益忘其
身之病也初西安有警權調近地民兵五千以城守
歲久爲例有力者因私役焉乃議歲用千人春秋番
代餘悉罷遣歸農辛酉北虜小王子擁衆數萬入河
套往來延寧二邊遣大將提兵捍禦季麟督屬給餉
不絕劾總兵官恭順侯吳鑑怯衄宜罷鑑而以武安
侯鄭英代之寇屢入鎮原靖虜平涼季麟嚴兵以待
部下獲功甚衆在陝幾年倦倦以振勵下僚爲務
將領坐貪縱黜罷者七八人其所薦進類多名士論
者以爲知人十七年御馬監及京營草場地止之在

薊州者與民產錯置屢屢互爭召還巡撫薊州等處
季麟亟具疏乞休又命移文促之既至請官會勘據
景泰間奏案正其疆界衆愜服爭端遂息臺諫不知
移鎮出於簡在也或以爲言季麟累辯求去荷優詔
勉留不聽乙丑武宗初繼大統以養病請報允給
傳以行歸林下十有四年而卒享年七十有四贈右
都御史謚僖敏

艾璞

艾璞字德潤南昌縣人成化辛丑進士授工部都水
司主事丙午調兵部武選弘治戊申陞職方司郎中

壬子以冊東官充朝鮮國正使賜麒麟服癸丑調武
選丙辰陞通政司右通政提督曆其甲子陞光祿寺
卿乙丑命以右副都御史總理糧儲巡撫南畿其在
都水拮据經營出納惟當在兵部勤慎匪懈先後如
一日籌畫邊事率中其機會典選有法人誦其便又
以北虜入寇陳六事咸切時務在光祿裁省浮費日
與貴倖相忤人以爲難在南京于崇明施鈕二巨賊
賜銀幣且降勅獎諭又重定於日加耗例其餘興革
亦多犁然當人心時南京守備魏國公爲奸民所愚
以原有欽賜田若干埋沒無錫縣奏於朝命會巡按

曾御史勘之田實一二小民納糧當差璞與巡按廉
得其實盡斷還民魏公恥之奏益力逆瑾主其事力
執如前時瑾盡革天下巡撫竟坐斷給不公編管海
南爲民家衆隨往且以巨杖五十幾斃病踰年始愈
瑾誅乃詔復原官致仕越三年癸酉卒於家壽六十
三

楊峻

楊峻字惟高進賢縣人成化丙辰進士授丹徒知縣
陞監察御史歷廣東按察司僉事以父喪去服闋改
福建汀漳兵備陞浙江按察司副使歷任憲長有坐

報父仇者抵死峻以篤於孝竟釋之尋轉左布政使
鎮守中官方橫取於民督及有司峻面數其罪取鐵
索欲相與拘械詣京乃稍戢陞南京光祿寺卿歲進
酒以軍民轉運後期多敗者屬吏往往獲罪峻請命
巡倉者監之始無宿累遂著爲令弘治末引年乞休
致家居十載而卒賜祭葬如例峻爲人剛毅居官能
守廉儉政事則精敏云歸林下幾十年足跡不一入
縣門親終廬墓至老生日不爲宴飲接後進必以正
論誨迪鄉邦稱之

范兆祥

范兆祥豐城人七歲作登堯山詩以奇童稱登弘治丙辰進士時北虜入貢廷議依違可否兆祥上疏數千言其間尊國體料夷情有人所不敢道者選庶吉士授檢討應詔陳言時政語切官闈下獄尋釋之出爲涇府長史上疏論計安民社三事時議招南兵備邊兆祥力言不教之民不宜驅而遠征議寢後以不附中人復下獄編戍放歸兆祥有才名尚氣節雖屢困憊不少沮抑

熊卓

熊卓豐城人由進士爲平湖知縣擢御史陳時政得

失奉勅勞軍盡革乾沒之弊按都督神英贓罪論如
法雖權貴莫之撓巡按廣東墨吏望風先遁時逆瑾
權傾中外卓獨抗節不屈遂誣以奸黨勒令致仕

汪深

汪深進賢人由鄉舉授蘄水知縣下車首詢民瘼革
弊政清虛糧積穀至四萬餘石後饑歲藉以賑卹修
築堤堰旱澇有備葺學宮文風爲之一新卒於官士
民哀慕之祀名宦祠

朱廷聲

朱廷聲進賢人登弘治己未進士拜官行人以狷介

聞武宗時中官劉瑾以勢躡籍中外天下側目廷
聲乃上疏請誅奸慝以清君側瑾銜之矯誣逐黨人
中以危禍罰米落職勒停十年廷聲毅然當之不爲
禍林迨瑾伏誅公道昭明歲辛未以錄用言官疏銓
部題復起秩卽署歷官浙江按察司僉事湖廣副使
河南左叅政湖廣右布政使福建左布政使陞都察
院右副都御史巡撫湖廣復陞刑部右侍郎其擢中
丞也力替顯陵工成屢承先帝金幣殊賜會荆
襄地方值歲凶荒百姓饑疫流離載道老幼失所廷
聲目擊其艱乃歎曰此莫非天子百姓可忍使填

溝整乎况此等雖值天時之變實皆爲吾民父母者之責也遂疏出內帑數萬所全活不可勝計又奏收贖律鈔官司無得侵濫俱貯以備賑荒迄今守爲定典及陞刑侍直以抗節恥屈權貴會有風雷彗孛變遂抗疏乞休雖蒙溫旨慰留廷聲曰吾爲國重臣不能上消天變可尸位乎歸志益決力以疾辭嘉靖丁酉八月二十四日卒

熊桂

熊桂字世芳南昌人弘治戊午舉於鄉己未進士明年以父喪去服除授大理寺左評事尋陞寺副寺正

武宗初太監劉瑾用事以峻法繩下嘗倚詔條凡藏
匿軍丁罪及隣佑五六家以肆羅織部屬承望風旨
誣累嘗百數十人桂建言詔令權宜惟一時可行

祖宗成憲則百世當守乞毋輕變枉致冤濫 上是

之由是得免者以萬計屠都御史欲殺一指揮非其
罪桂駁回五六次將聞於 上乃止瑾逆謀敗露黨

與洵洵大臣慮有變促成獄法司多出入瑾門下者
不無觀望駭愕失措莫敢先發桂毅然承之不終夕
成招盡得奸逆之情其外應凶談如宸濠亦不肯以
親王少諱也嘗治安化王獄其夜收三千人擬同謀

併坐家口桂曰同謀機事也株連三千人且及家口
得爲機乎力與辦明所活不下萬人任凡六載巨細
務在平反庚午陞徽州府知府治績燁然最東南諸
郡嘗得海翁紫陽書院舊址乃復于郡邑掄士有學
行者唐臯等八十餘人講道其中資以俸餘又買田
千餘畝給祭祀及來學者爲久遠計國朝守令不握
兵官軍又不得擅調正統間設民壯爲守城計迄於
成化又增添之地方有警則徵發捕邏而有司驅迫
又有不可勝言者徽民甚苦之不肯就役桂爲審丁
糧定顧役法至今稱便時冗食日增內供白糧出蘇

松常者勢不能給諂諛聚斂之臣飛派於徽入方新
乾清官取材於徽當浙之半桂委曲白上司至於涕
泣得減其半以蘇民困任甫三載進秩中憲大夫滿
六年丙子陞山東叅政至山東分守東兗道一夕河
汎泛曹州兵備吳副使忽驚斃桂晝夜馳數百里往
視之水勢甚暴乃齋沐臨河祭告黜貪酷官吏數人
水遂少定因築塞之嘗謁闕里見祭器不稱王祀度
所費可千金會民有發地窖得錢數百斗來報計之
適足用遂命工鑄造規制乃備戊寅督運至京師中
貴歲常包攬利入本色以便浸漁桂力言於上得

納輕齋省費不下數萬山東人頌之未幾奔太恭人喪年五十八卒神氣秀發狀貌豐偉學見本領故剛大之氣經濟之才雖甚韜襲終莫能自晦也在大理有駁稿在徽有治徽大略及平生奏疏詩文號石崖稿若干卷藏於家

陳奎

陳奎字文衣南昌人登弘治己未進士除廣濟知縣爲縣有名召爲監察御史時逆瑾用事往覈甘肅爲儲忤瑾意撫徽過逮赴詔獄久之得白擢山西按察副使河南按察使山東右布政使廣西左布政使

仕二十餘年所歷皆憲職慎于刑獄精斷明恕竄正吏牘運筆如流吏抱案立不得出一語屢讞大辟可疑者率破械釋之而姦賊之吏則按劾無少貸以性直不能隨世俯仰爲貴要所忌謗者謂前在河南嘗爲逆藩市馬朝廷下所司考驗無幾微實跡雖事枉得白而已倦且休矣屬疾方劇適奉使南方間道歸無他語但敕以守官報國葬制從儉而已

周季鳳

周季鳳字公儀號未軒江西寧州人弘治癸丑進士授刑部主事恤刑湖廣多所平反陞副憲時麗江知

府木泰與土官刺馬琦仇殺未解至則檄謂盍由上官處分柰何以兵亂不退且徵兵盡剪滅之惶懼立解黎溪賊阿杓誘衆寇村寨隣省會勦未克陰遣官軍分布要路賊就擒土官毋師古與族構難招致諭以禍福皆感泣罷爭越雋官舍欺隱田糧查併省其增額衆相勸諭遂完積逋後以奉例裁革歸瑾復矯詔令輸粟于邊蓋以中官張辰倚瑾勢代鎮茶虐江楚而季鳳特爲嚴禁故瑾啣之深也後瑾敗累官右副都御史巡撫保定巨賊王堂趙延壽等流劫郡邑驍勁無敵衆愕眙罔措曰是惡能爲潛授方畧立斬

渠魁餘黨竄絕旋以南京刑部侍郎解任家后病卒

萬夔

萬夔江西新建縣人進士由潛山知縣選陝西道御史建言廷杖降亳州判官陞常熟知縣無爲知州致仕

熊劔化

熊劔化號際華豐城人中萬曆辛丑進士授增城知縣循聲蔚起詔繁華亭搜奸剔弊人不敢欺又開心見誠無所隱伏士民有清如水直如絃之謠選入臺中海內想望風采未及實授而卒

李材

李材號見羅豐城人以聖學兼武功稍見忌于當路遂引疾求退精學問者十年起用金騰功勛茂著旣撫鄖陽復以滇事被逮賴公論得出戍時耄矣尤講學不倦所著有學古知本圖說觀堂稿經正錄

魏良政

魏良政字師伊兄良弼字師說新建人文成撫江西時昆季胥從受學時唐直指龍邵督學銳皆顛守舊學每與諸生言王公天資高難學諸生各守常業毋奔謁爲虛談時從游者頗憚避而師伊兄弟毅然不

爲動師伊孝友敦朴渾然天成聞道最早燕居無惰
容嘗曰學問頭腦旣明惟專一得之氣專則清精專
則明神專則靈又曰不尤人何人不可處不累事何
事不可爲發解江西乃遂卒兄師說嘗言夢中見良
政輒流汗浹背其生前可知